

四庫全書

集部

欽定四庫全書

後村詩話卷十

宋 劉克莊 編

此一卷專為杜陵補遺

陳拾遺故宅詩至此之郭元振唐人敬重拾遺如此文  
上人上方云庭前猛虎臥遂得文公廬吾師雨花外不  
下十年餘長者自布金禪龕只晏如又云王侯與螻蟻  
同盡遂丘墟願聞第一義回向心地初此僧不知何人

必深于內典者

莫相疑行男兒生無所成頭皓白牙齒欲落真可惜憶  
昨獻賦蓬萊宮自怪一日聲輝赫集賢學士如堵牆觀  
我落筆中書堂往時文彩動人主此日饑寒趨路傍晚  
將末契托年少當面輸心背面笑寄謝悠悠世上兒不  
爭好惡莫相疑他人于當面輸心背後笑之下文必有  
餘怨公卒章優游閒暇了無忿懣

閬州絕句云殿前兵馬雖驍雄縱暴略與羌渾同聞道

殺人漢水上婦女多在官軍中當時殿前兵無紀律如  
此別篇云二十一家同入蜀惟殘一人出駱谷必是子  
美自謂桺木為風雨所拔云倚江桺樹草堂前故老相  
傳二百年誅茅卜居總為此五月髣髴聞寒蟬東南飄  
風動地至江翻石走流雲氣滄波老樹性所愛浦上童  
童一青蓋虎倒龍顛委榛棘淚痕血點垂胃臆我有新  
詩何處吟草堂自此無顏色茅屋為秋風所破歌云八  
月秋高風怒號卷我屋上三重茅南村羣童欺我老無

力忍能對面為盜賊公然抱茅入竹去脣焦口燥呼不  
得秋天漠漠向昏黑布衾多年冷似鐵嬌兒惡卧踏裏  
裂牀牀屋漏無乾處雨脚如麻未斷絕安得廣厦千萬  
間大庇天下寒士俱歡顏風雨不動安如山嗚呼何時  
眼前突兀見此屋吾廬獨破受凍死亦足溪榭屋茅為  
風所拔不以草堂茅屋飄颻為憂方有惜古木庇寒士  
之意其迂濶如此

天遣行云九度將書向洛陽十年骨肉無消息大麥行

云大麥乾枯小麥黃婦女行泣夫走藏問誰腰鐮胡  
與羌苦戰行云苦戰身死馬將軍云是伏波之子孫注  
馬璘也去秋行云去秋涪江水落時臂搶走馬誰家兒  
到今不知白骨處部曲有去皆無歸戰場冤魂每夜哭  
空令野營猛士悲此數篇皆可補史之缺文但遂州白  
骨不歸者失其姓名當考

草堂云孤天暗江海難為遊五湖不忍竟舍此復來難  
榛蕪天下尚未寧健兒勝腐儒此篇嘆還吳未可重值

浣花榛蕪四松萬竹無恙隣里大官賓客喜歸可見隨  
寓而安之意于時天下未寧固有健兒勝腐儒之句辛  
章云飄飄風塵地何地置老夫飲啄愧殘生食薇不敢  
餘其語意雍容閒暇有雅人之深致

牽牛織女篇云牽牛出河西織女處其東萬古永相望  
七夕誰見同神光竟難候此事終朦朧颯然精靈合何  
必秋遂通前人詠牛女所未及

壯遊詩押五十六韻在五言古風中尤多悲壯語如云

往者十四五出遊翰墨場斯文崔魏徒以我似班揚又  
云脫畧小時輩結交皆老蒼東下姑蘇臺已具浮海航  
到今有遺恨不得窮扶桑又云上感九廟焚下憫萬  
民瘡小臣議論絕老病客殊方雖荆卿之歌雍門之琴  
高漸離之筑音調節奏不如是之跌蕩豪放也

二角鷹篇云惡鳥飛飛啄金屋安得爾輩空其羣驅出  
六合梟鸞分子美前有左綿畫角鷹詩此二鷹乃真  
本非左綿畫本也



寫懷篇云禍首燧人氏厲階董狐筆君看燈燭張轉使  
飛蛾密注云燧人火化而爭欲之心生董狐直筆而是非  
之端起其說甚新

可嘆篇云天上浮雲如白衣斯須改變如蒼狗古往今  
來共一時人生萬事無不有丈夫正色動引經鄴城客  
子王季友貧窮老叟家賣屐好事就之為攜酒豫章太  
守高帝孫引為賓客敬頗久聞道三年未曾語小心恐  
懼閉其口太守得之更不疑人生反覆看亦醜時危可

仗真豪俊二人得置君側否詩言王季友誠賢士但為  
太守客當有獄市薤水之規今三年恐懼不出口何也  
謂今且如此使其在明君側豈能補袞職之闕哉非以  
嘿求容若以嘿為賢恐非篤論然子美終以義和禹事  
業望王李殊不可曉末云吾輩碌碌飽飯行風后力牧  
長回首乃知子美以風后力牧自期其抱負尤不淺矣  
醉為馬墜云騎馬忽憶少年時散蹄迸落瞿塘石白帝  
城門水雲外低身直下八千尺向來皓首驚萬人自倚

紅顏能騎射不虞一蹶終損傷人生快意多所辱朋知  
來問覲我顏杖藜強起依僮僕語盡還成開口笑提攜  
別掃清溪曲共指西日不相貸喧呼且覆杯中綠此篇  
可見壯老健衰之異末云何必走馬來為問君不見嵇  
康養生遭殺戮南華云魯有單豹者巖居水飲七十有  
童孺之色不幸而遇餓虎殺而食之有張毅者高門縣  
薄無不走也四十而有內熱之病以死豹養其內而虎  
食其外毅養其外而病攻其內乃公卒章之意

遣懷篇云梁孝王都邑之盛及遣懷與高適李白同吹  
臺末有撫孤之句公飄飄一霸旅而葛帔練裙之念如  
此高李豈無厚祿故人聞之得無愧乎

大覺蘭若云一老猶鳴日暮鐘諸僧尚乞齋時飯可見  
寺小僧貧之狀

折檻行云嗚呼房魏不復見秦王學士時難羨千載少  
似朱雲人至今折檻空嶙峋婁公不語宋公語尚憶先  
皇容直臣此必子美追懷諫省時論事不合傷今思古

而作

朱鳳行云君不見瀟湘之山衡山高山巔朱鳳聲嗷嗷  
側身長顧求其羣翅垂口噤心甚勞下愍百鳥在網羅  
黃雀最小猶難逃願分竹實及螻蟻盡使鵠鵠相怒號  
衡嶽有朱鳥峯此篇言朱鳥孤立無助栖托雖高不忍  
自求飽必欲百鳥如黃雀之類在網羅者皆分竹實以  
及之不暇計鵠鵠輩怒號矣

遣遇篇云石間采薇女鬻菜輸官曹丈夫死百役暮返

空村號聞見事略同刻剝及錐刀貴人豈不仁視爾如  
莠蒿夫死于役僅存女婦采薇鬻菜以輸官夫民之窮  
甚矣而官吏刻剝尤甚于錐刀此不獨指里胥亭長輩  
內自租庸使外自觀察使不得不受其責故有貴人豈  
不仁視汝如莠蒿之句錄之以告居大位者

望嶽云南嶽配朱鳥禮秩自百王歟吸領地靈瀕洞半  
炎方邦家用祀典在德非馨香巡守何寂寥有虞今則  
亡祝融五峯尊峯峯次低昂紫蓋獨不朝爭長葉相望

恭聞魏夫人羣仙夾翱翔望嶽之作多矣余行役過焉  
款靈霄坐恍亭宿勝業寺累日嶽令與山人謂余為  
向道者將以昧爽登絕頂夕忽大雪余猶攀緣而上望  
上封咫尺雪泥沒膝不可行然耳目之睹記公詩真此  
圖經也

謁玄元廟次昭陵二詩俱嚴麗駿壯為千古五言律詩  
典則其歸美開基責望守成傷今思古有無窮忠愛之  
義

與韋左丞五言二篇當以古風為勝左丞名濟又與韋左相律詩二十韻頗稱其相業此韋公名見素

與張卿二十韻張卿名垧說子均弟弟兄貴盛遭漁陽之變合門殉難未足以報唐家今相率北面而臣賊垧帝堦也故明皇欲致之死訖全要領可謂失刑

寄高書記云歎息高生老新詩日又多美名人不及佳句法如何主將收才子崆峒足凱歌聞君已朱紱且得慰蹉跎憶李白云不見李生久佯狂真可哀世人皆欲殺吾意獨



憐才敏捷詩千首飄零酒一盃匡山讀書處頭白早歸  
來此二篇非高李不敢當非子美不能道

遊何將軍山林前十首後半之如云鮮鯽銀絲鱠香芹  
碧澗羹又云萬里戎王子何年別月支漢使徒空到神  
農竟不知注云何將軍常征西域禽其王子歸傳其地  
花草數種又云花妥鶯捎蝶溪喧獺趣魚又云手自移  
蒲柳家纔足稻梁何將軍舊注莫詳其人公詩有將軍  
不好武稚子總能文之句必勲貴中之好事者

遣興云驥子好男兒前年學語時問知人客姓誦得老  
夫詩世亂憐渠小家貧仰母慈鹿門攜不遂鴈足繫  
難期天地軍麾滿山河戰角悲儻歸免相失見日敢辭  
遲驥子宗武小名公稱之如此公以其知客姓誦翁詩  
為喜又別篇云驥子春猶隔又云驥子最憐渠鍾情幼  
子如此而無一字及熊兒故余疑宗文失學

憶弟云喪亂同吾弟饑寒傍濟州人稀書不列兵在見  
何由又云百戰令誰在三年望汝歸又元日寄妹云近

聞韋氏妹近在漢鍾離春城迴北斗郢樹發南枝不見  
朝正使啼痕滿面垂公流落顛沛而一念不忘弟妹內  
云百戰今誰在三年望汝歸又云不見朝正使啼痕滿  
面垂讀之感慨不但隆友愛而厚倫紀其怨離亂而思  
承平以不見朝正使為恨言四方表章未達行在恐未  
有見妹之期耳

聞官軍臨賊篇二十韵多佳句如云泰山當警蹕漢苑  
入旌旄路濕羊腸險雲橫雉尾高可見崎嶇巴蜀播遷

梁益乘輿危迫之狀元帥歸龍種司空握豹韜注云廣  
平王為元帥郭汾陽副之前軍蘇武節左將呂虔刀其  
叙時事甚悲壯老健末云家家賣釵釧只待獻春醪寧  
賣釵釧以易香醪可見時人厭亂之極贈嚴閣老云客  
禮容疎放官曹可接聯新詩句句好應任老夫傳嚴武  
雖跌蕩不羈然能容杜陵亦豪傑之士其詩往往附見  
杜集所謂句句好之評亦非過情之譽

送郭中丞云箭入昭陽殿笳吟細柳營內人紅袖泣王

子白衣行詳此二聯必是述代宗幸陝之事

春宿左省云不寢聽金鑰因風想玉珂明朝有封事數  
問夜如何岑參寄左省杜拾遺篇云聯步趨丹陛分曹  
限紫薇曉隨天仗入暮惹御香歸白髮悲花落青雲羨  
鳥飛聖朝無闕事自覺諫書稀岑杜同在諫省時兩宮  
蒙塵時事可言者多矣杜云有封事問夜如何岑云聖  
朝無闕事自覺諫書稀岑有愧于杜多矣

秦州五言二十首內云州圖領同谷驛道出流沙降虜

兼千帳居人有萬家馬驕珠汗落胡舞白蹄斜古注白  
蹄胡名又云鼓角綠邊郡川原欲夜時萬方聲一槩吾  
道竟何之又云傳道東柯谷深藏數十家瘦地翻宜粟  
陽坡可種瓜又詩云萬古仇池穴潛通小有天何時一  
茅屋送老白雲邊唐人遊邊之作數十篇中間有三數  
篇一篇中間有一二聯可采若此二十篇山川城郭之  
異土地風氣所宜開卷一覽盡在是矣綱山送靳帥云  
杜陵詩卷是圖經豈不信然鼓角篇云萬方聲一槩吾

道竟何之聽角者多矣孰知此言之悲哉

示姪佐云嗣宗諸子姪早覺仲容賢舊注佐草堂在東  
柯谷又三首內云白露黃梁熟分張素有期又云甚聞  
霜薤白重惠意如何佐別業有黃梁又有霜薤分遺尊  
老其生理必小康者

阮隱居致薤云盈筐承露薤不待致書求東比青芻色  
圓齊玉筋頭衰年關鬲冷味煖腹無憂公轉側兵火間  
饑寒襁褓以詩考之如薇如蕨如蘆如笋如薤如蒼耳

如蒿苳皆入賦詠真成一菜肚老人矣然公于菜中尤  
重薤有味煖腹無憂之句非嗜生冷者貴人日費萬錢  
或一生食萬羊子美晚途以來陽令饋白酒牛肉暴卒  
豈若常蔬茹乎客至云舍南舍北皆春水但見羣鷗日  
日來花徑不曾緣客掃蓬門今始為君開盤飧市遠無  
兼味樽酒家貧只舊醅肯與隣翁相對飲隔離呼取盞  
餘盃此篇若戲效元白體者嚴武答杜二云卧向巴山  
落月時兩鄉千里夢相思可但步兵偏愛酒也知光祿



最能詩江頭亦葉楓愁客籬外黃花菊對誰跂馬望君  
非一度冷猿秋鴈不勝悲嚴公詩亦佳作豈近朱者亦  
耶杜有別嚴公五言云江村獨歸去寂寞養殘生可見  
子美潔于去就之際

懷舊云地下蘇司業親情獨有君那因喪亂後便有死  
生分老罷知明鏡悲來望白雲自從失詞伯不復更論  
文源明得卒章十字可以不朽矣

題玄武禪師屋壁云錫飛常近鶴杯渡不驚鷗玄武師未

詳

贈李白云豈有青精飯使我顏色好若之大藥資山林  
跡如掃李侯金閨彥脫身事幽討亦有梁宋遊相期拾  
瑤草公與岑參高適詩皆人情世法惟與謫仙唱和皆  
世外一種說話

別房太尉墓云對碁陪謝傅把劍覓徐君用事極精切  
自閭赴蜀云棧懸斜避石橋斷却尋溪山館云山鬼吹  
燈滅時人語夜闌蜀道荒僻如此

呈嚴公云胡為來幕下祇合在舟中又云老妻憂坐痺  
幼女問頭風又云寬容存性拙翦拂念途窮又云曉入  
朱扉啟昏歸畫角終此篇曲盡幕府賓主情誼春日江  
村云亦管隨王命銀章付老翁豈知牙齒落名在薦賢  
中注漢官儀丞郎月給亦管大筆一雙公時以虞部參  
謀服緋故其辭如此卒章未免有周南留滯之歎然微  
而婉

江上值水云為人性僻耽佳句語不驚人死不休焉得思

如陶謝手令渠述作與同遊前兩句自負不淺卒章乃推尊陶謝可見前哲服善不爭名之意

寄杜位云逐客雖皆萬里去悲君已是十年流玉壘題書心緒亂何時更得曲江遊此篇言位近聞寬法離新州注云位京中宅近西按新州今屬廣東去京師遠卒章思與位復遊曲江則非京師之新州矣當詳攷

登高云無邊落木蕭蕭下不盡長江滾滾來萬里悲秋常作客百年多病獨登臺二聯不用故事自然高妙在

樊川齊山九日七言之上

十二月一日雲安縣云一聲何處送書鴈百丈誰家上  
瀨船又云負鹽出井此溪女打鼓發船何郡郎此二聯  
縣圖也

哭鄭司戶蘇少監云豪傑誰人在文章掃地無此篇二  
十韻錄一聯于此

聞河北節度入朝口號云喧喧道路多歌謠河北將軍  
盡入朝始是乾坤王室正却教江漢客魂銷又云北道

諸公無表來茫然庶事遣人猜又云燕趙休矜出佳麗  
宮闈不擬選才人讀杜集至三十卷多厭缺

亂離憤嫉跋扈之作此口號十二篇以河北  
節將入朝為喜以北道無表為猜欲漁陽突騎邯鄲兒  
之歸闕欲主上如周宣漢武欲諸公為孝子忠臣真一  
飯不忘君者天寶禍亂自燕趙始今安史已無噍類燕  
趙佳麗可開選色之場矣子美方有宮闈不擬選才人  
之句所謂舉筆不忘規諫者耶

終明府水樓云絕壁過雲開錦繡疎松隔水奏笙簧此  
聯未經人道

別李八秘書云反氣凌雲在妖星下直廬又云不才同  
補袞奉詔許牽裾又云御鞍金駉裏宮硯玉蟾蜍此篇  
三十韵叙舊頗詳秘書不書名必是與公同扈從入蜀  
者觀不才同補袞奉詔許牽裾之句似與公同諫省金  
駉裏玉蟾蜍近臣方有此賜史失其名當攷

孤鴈云孤鴈不飲啄飛鳴聲念羣誰憐一片影相失

萬重雲望盡似猶見哀多如更聞野鴟無意緒鳴噪自  
紛紛讀此篇便見得鮑常輩止是小家數

吾宗篇云吾宗老孫子質朴古人風耕鑿安時論衣冠  
與世同昔溫公約康節服深衣答云如今人只服今衣  
溫公不能強

溪上云塞俗人無井山田飯有沙溪西土風

八月十六夜云河漢近人流絕佳

秋興云聞道長安似奕碁百年世事不勝悲王侯第宅



皆新主文武衣冠異昔時直北關山金鼓振征西車馬  
羽書遲魚龍寂寞秋江冷故國平居有所思公詩叙亂  
離多百韻或五十韻或三四十韻惟此篇簡而切

社日云今日江南老他時渭北童又云鴟鷂迴金關誰  
憐病峽中羈旅懷故鄉老大憶髫年人之至情也公生  
長韋杜老逢社日百官朝天公獨病臥峽中情見乎辭  
如此

詠懷古跡內先主孔明廟云古廟杉松巢水鶴歲時伏

臘走村翁武侯祠屋長隣近一體君臣祭祀同又云萬古雲霄一羽毛又云伯仲之間見伊呂卧龍公沒已千載而有志世道者皆以三代之佐許之如云萬古雲霄一羽毛如儕之伊呂伯仲間而以蕭曹為不足道此論皆自子美發之考亭南軒近世大儒不能發也

昭君村云畫圖省識春風面環佩空歸月夜魂亦佳句諸將篇云獨使至尊憂社稷諸君何以答昇平其責望諸將深矣此篇謂張仁亶築三城本欲掃平吐蕃豈知

乃用以球朔方

宗武生日云詩是吾家事又云覓句新知律乃翁稱之如此而宗武詩無一字存者不若蘇叔黨有集行世

有感云諸侯春不貢使者日相望又云不過行儉德盜賊本王臣又云領郡輒無色之官皆有詞願聞哀痛詔端拱問瘡痍此三數聯畧見當日時事使者相望而不貢自若必是內租庸外觀察諸使符牒督賦急于星火領郡之官者皆憚行與至于欲以儉德化盜賊為王臣

又欲下哀痛詔以問瘡痍唐人惟元結陽城有此意公  
于舂陵行至比之華星秋月不刊之言也

東屯云築場憐蟻穴拾穗許村童可見民胞物與之意  
柳司馬至云有使歸三峽相過問兩京函關猶出將渭  
水更屯兵設備邯鄲道和親邏些城幽燕唯鳥去商洛  
少人行公去國萬里逢人輒問兩京此數聯是大厯間  
事

元日示宗武云汝啼吾手戰吾笑汝身長前有明年共

我長之語此又云吾笑汝身長見愛子長成而喜憶江東弟不見而悲其慈愛如此

放船出峽四十韻按公天寶十五載入蜀凡十三年羈旅非一處而在夔最久至大曆三年始出陝之江陵又二年卒于耒陽蜀中諸詩惟夔最多四十韻反復曲折若不忍去雲安者

贈起居田舍人澄詩云舍人退食收封事宮女開函近御筵唐以舍人給事中書匭事又云宮女開函以所投

封事奏御又云晴窗點檢白雲篇注云謂武帝秋風詞  
別韋左丞詩云常擬報一飯况懷辭大臣若甚德韋公  
者然末句云白鷗沒浩蕩萬里誰能馴公自植立每如  
此

不意青草湖扁舟落吾手中原消息斷黃屋今安否去  
蜀之吳楚身與妻子弟妹未知逃生之所而以中原消  
息斷黃屋安否為憂此山谷所以有長使詩人拜畫圖  
煎膠續絃千古無之歎



後村詩話卷十

欽定四庫全書

集部

後村詩話卷十二

十四

詳校官石中允臣薩敏

主事銜臣徐以坤覆勘

總校官編修臣王燕緒

校對官編修臣勵守謙

謄錄監生臣劉贊化



欽定四庫全書

後村詩話卷十一

宋 劉克莊 編

孟襄陽詩如微雲澹河漢疎雨滴梧桐之句館閣諸彥  
嘆服而集中不收豈逸其全篇乎寄衣曲云畏瘦宜傷  
窄防寒更厚裝又魚行潭樹下猿挂島蘿間警語不一  
老杜少所推服獨稱其句句堪傳集中每以孟先生目  
之

韋蘓州絕句云紫閣西邊第幾峰茅齋夜雪虎行蹤遙  
看黛色知何處欲出山門尋暮鐘五言云馬卿猶有壁  
漁父自無家想子今何處扁舟隱荻花溫泉行出身天  
寶今年幾頑鈍如鎚命如紙作官不了却歸來還是杜  
陵一男子北風慘慘投溫泉忽憶先皇遊幸年蒙恩每  
浴華池水扈獵不睎渭北田一朝鑄鼎降龍馭小臣髯  
絕不得去今來蕭瑟萬井空惟見蒼山起煙霧可憐躡  
蹬失風波仰天大叫無奈何敝裘羸馬過故苑賴遇主

人杯酒多沈下賢秦夢記云泣葬一枝紅生同死不同  
梨花寒食夜深閉翠微宮唐詩多流麗嫵媚有粉繪氣  
咸以辨博名家惟蘓州繼陳拾遺李翰林崛起為一種  
清絕高遠之言以矯之其五言精巧不減唐人至于古  
體歌行如溫泉行之類欲與李杜並驅前世惟陶同時  
惟柳可以把臂入社餘人皆在下風

岑參送人落第五言云獻賦頭欲白寒家衣已穿羞過  
灞陵樹歸種汶陽田客舍少鄉信牀頭無酒錢聖朝徒

側席濟上獨遺賢又送顏少府云愛客多酒債罷官無  
俸錢又宿太白東溪李老舍寄弟姪云渭上秋雨過北  
風正騷騷天晴諸山出太白峰最高主人東溪老兩耳  
生長毫遠近知百歲子孫皆二毛中庭井欄上一架獼  
猴桃石泉飯香粳酒甕開新糟愛茲田中趣始悟世上  
勞我行有勝事書此寄爾曹春夢七言云洞庭昨夜春  
風起故人尚隔湘江水枕上片時春夢中行盡江南幾  
千里韋員外家花樹歌云今年花似去年好去年人到

今年老始知人老不如花可惜落花君莫掃太白胡僧歌  
云聞有胡僧在太白蘭若去天三百尺手持楞伽入中峰世  
人難見但聞鐘窓邊杖錫解兩虎牀下鉢盂藏一龍草衣  
不針復不線兩耳垂肩眉覆面此僧年幾那得知手種青  
松今十圍心將流水同清淨身與浮雲無是非商山老人  
已曾識願一見之何由得山中有僧人不識城裏看山空  
黛色登鄴城古體云下馬空鄴城城空復何見東風吹野  
火暮入飛雲殿又云城隅南對望陵臺漳水東流不復回

武帝宮中人去盡年年春色為誰來高適五言云散帙至  
棲鳥明燈留故人又云秋韭何青青藥苗數百畦耕耘有山  
田紡績有山妻簷前舉醇醪竈下烹隻雞人生苟如此何  
必組與珪春望云出門何所見春色滿平蕪可嘆無知己  
高陽一酒徒漁樵歌云曲岸深潭一山叟駐眼看釣不移  
手世人欲得知姓名良久問他不開口笋皮笠子荷葉衣  
心無所營守釣磯料得孤舟無定止日暮持竿何處歸七言  
句云旅館寒燈夜不眠客心何事轉悽然故鄉今夜應千

里愁鬢明朝更一年高岑二公詩氣魄力量音調節奏生  
逢開元承平之際與李杜二公更唱迭吟所謂治世之音  
也天寶亂離之後所作率多窮愁感嘆意錄之以觀世  
變

盧綸送萬巨六言云人愁荒村路細馬怯寒溪水深望  
盡青山獨立更知何處相尋又白髮嘆五言云髮白曉  
梳頭女驚妻淚流不知絲色後堪得幾回秋送成都丞  
云棧長山雨響溪亂火田稀送王山人遊江東云燕歸

巢已盡鶴語冢難尋同柳侍郎題新昌里云庭莎成野  
席欄藥是家蔬夜中得循州趙司馬書寄回使云瘴  
海寄雙魚中宵達我居兩行燈下淚一紙嶺南書地說  
炎蒸極人稱老病餘殷勤報賈傅莫共酒杯踈從軍行  
云雲嶺無人跡冰河有鴈聲李陵甘此沒惆悵漢公卿  
山中別墅云葦橋雙鶴至收果衆援隨訓麻道士見寄  
云聞逐樵夫聞看碁忽逢人世是秦時開雲種玉嫌山  
淺渡海傳書恠鶴遲陰洞石幢微有字古壇松樹半無



枝煩君遠視青囊錄願得相從一問師謁液上人云半  
夜峯中有磬聲偶逢樵者問山名上方月暗聞僧語下  
路林疎見鹿行野鶴巢邊松最老毒龍潛處水偏清願  
得遠公知姓字焚香洗鉢過浮生春日登樓有懷云年  
來笑伴皆歸去今日清明獨上樓晚次鄂州云估客晝  
眠知浪靜舟人夜語覺潮生舊業已隨征戰盡更堪江  
上鼓鼙聲姚美人拍箏歌云昭陽伴裏最聰明出到人  
間纔長成遙知禁曲難翻處猶自君王說小名

李益古促促曲云促促何促促黃河九回曲嫁與棹船  
郎空牀將影宿不道君心不如石那令妾貌長如玉贈  
邢校書云俱從四方士共會九秋中斷蓬與落葉相值  
各因風送流人云謗遠人多感官微不自明疇昔長沙  
事三年召賈生喜見外弟云十年亂離後長大一相逢  
問姓驚初見稱名憶舊容別來滄海事語罷暮天鐘明  
日巴陵道秋山又幾重登夏州城云無定河邊數株柳  
共送行人一杯酒健兒起作和蕃歌齊唱嗚嗚盡垂手

惟孱弱者正直當不虧何人采國風吾欲獻此辭次山  
春陵五言真稷契口中語杜陵粲粲元道州之篇即此  
二詩之跋尾也然其時內租庸使外觀察使未有敢奏  
劾次山以附益聚斂求悅者使遇今日執牙籌析秋毫  
者居主計之任則次山塵粉矣

王維五言云興來啼鳥緩坐久落花多又烹茶邀上客  
看竹到貧家又古木無人徑深山何處鐘又柘漿菰米  
飯葍醬露葵羹又行到水窮處坐看雲起時偶然值林

叟談笑無還期又住處名愚谷何煩問是非又蔡邕今  
已老書籍與何人早春云憶君長入夢歸晚更生疑不及  
紅簷燕雙栖綠草時桃源行云樵客初傳漢姓名居人  
未改秦衣服又藤花欲闌藏孫子栢葉初齊養麝香洛  
陽女兒行云自憐碧玉親教舞不惜珊瑚持與人少年  
行云縱死猶聞俠骨香老將行云少年十五二十時步  
行奪取胡馬騎射殺山中白額虎肯數鄴下黃鬚兒一  
身轉戰三千里一劍曾當百萬師漢兵奮迅如霹靂虜

騎奔騰畏蒺藜衛青不敗由天幸李廣無功緣數奇自  
從棄置便衰朽世事蹉跎成白首昔時飛箭無全目今  
日垂楊生左肘路傍時賣故侯瓜門前學種先生柳莊  
茫古木連窮巷遼落寒山對虛牖誓令踈勒出飛泉  
不似潁川空使酒賀蘭山下陣如雲羽檄交馳日夕聞  
節使三河募年少詔書五道出將軍試拂鐵衣如雪色  
聊持寶劍動星文願得燕弓射天將耻令越甲鳴吳軍  
莫嫌舊日雲中守猶堪一戰立功勲雜五言云家住孟

津河門對孟津口常有江南船寄書家中否又君自故鄉來應知故鄉事來日綺窓前寒梅著花未右丞不汙天寶之亂大節凜然其詩擺落世間腥腐非食煙火人口中語其五六七言已多選入絕句今摘其古律體長篇警句于此

劉隨州送秦系云惆悵青山路煙霞老此人新年云老至居人下春歸在客先尋洪尊師云鶴老難知歲梅寒未作花送人云詩書滿蝸舍征稅及漁竿送穆喻德云

事直皇天在歸遲客路生送李中丞云流落征南將曾驅  
十萬師罷歸無舊業老去聽明時獨立三邊靜輕生一劍  
知茫茫漢江上日暮復何之餘干旅舍云渡口月初上鄰  
家漁未歸鄉心正欲絕何處搗寒衣北歸次秋浦云舊  
路青山在餘生白首歸漸知行近切不見鷓鴣飛松江獨  
宿云明月天涯夜青山江上秋一官成白首萬里寄滄州  
獄中見壁畫佛云不謂銜冤處而能窺大悲獨棲叢棘  
下還見雨花時地狹青蓮小城高白日遲幸親方便力尤

畏毒龍欺六言云危石纔通鳥道空山更有人家桃源定  
在深處澗水浮來落花送嚴維云明日行人已遠空餘淚  
滴回潮別嚴士元七言云細雨濕衣看不見閒花落地聽  
無聲過鄭山人居云寂寂孤鶯啼杏樹寥寥二犬吠桃源落  
花芳草無尋處萬壑千峯獨閉門見新厯云愁占著草終  
難決病對椒花倍自憐獻李節度云家散萬金酬士死  
身留一劍答君恩過賈誼宅云漢文有道思猶薄湘水無情  
弔豈知送人遊天台云落日獨搖金策去深山誰向石橋逢非



所云斗間誰與看，冤氣盆下無由見。太陽過裴舍人故居，  
云離花猶及重陽發。鄰笛那堪落日聽，贈于越居云自用黃。  
金買地居能嫌碧玉，隨人嫁送郭主簿。赴嶺南云料錢用盡，  
却為謗食客空多。誰報恩。

此二句似為周晉仙發

齊一和尚影堂云

身寄虛空和寓客，心將生滅是浮雲。又云舊地愁看雙  
樹在，空堂只是二燈懸。別李萬云故人早負千將器，誰  
言未展平生意。想君疇昔高步時，肯念如今折腰事。上  
裴尹云西城黯黯斜暉落，衆鳥紛紛皆有托。獨立雖輕

燕雀羣孤飛還懼鷹鷂搏自憐天上青雲路弔影徘徊  
獨愁暮銜花縱有報恩時擇木誰容托身處歲月蹉跎  
飛不進羽毛顛顛何人問遶樹空隨鳥鵲驚巢林只有  
鷓鴣分主人庭中蔭喬木愛此清陰欲棲宿少年挾彈  
遙相猜遂使驚飛往復迴不辭奮翼向君去唯怕金丸  
隨後來唐人號隨州為五言長城其五言六言七言妙  
絕者已選入絕句錢起輩非不極力欲躋攀隨州尺寸  
終不近傍豈才分有所局耶其七言長篇如上裴尹小

鳥之篇反復宛轉詞近而意遠似為五言所盡

張籍五言云長因送人處憶著別家時贈僧云翻經上  
蕉葉挂衲落藤花宿江店云停燈待賈客買酒與漁家  
五言云月冷邊帳濕沙昏夜探遲征人皆白首誰見靖  
邊時又云夜鹿伴茅屋秋猿守栗林又云蛙聲籬落下  
草色戶庭間七言云一山海上無城郭唯見松牌記象  
州又云山東二十餘年別今日相逢在上都說盡向來  
無限事相看摩捋白髭鬚又云洛陽城裏見秋風欲作

歸書意萬重復恐匆匆說不盡行人臨發又開封又云  
于君去後交遊少東野無來篋笥貧賴有白頭王建在  
眼前猶見詠詩人又崑崙兒云自愛肌膚黑如漆行時  
半脫木綿裘白苧云皎皎白苧白且鮮將作春衣稱少  
年裁縫長短不能定自持刀尺向姑前復恐蘭膏污纖  
指常遣傍人收墮珥衣裳著時寒食下還把玉鞭鞭白  
馬寄衣曲云官家亦自寄衣去貴從妾手著君身高堂  
姑老無侍子不得自到邊城裏慙慙為看初著時征夫

身上宜不宜又七言云願為玉鑾繫華軾終日有聲在  
君側又云洛陽北門北邙道喪車駢駢入秋草車前齊  
唱薤露歌高墳新起白茝茝朝朝暮暮人送葬洛陽城  
中人更多千金立碑高百尺終作誰家柱下石山頭松  
栢半無主地下白骨多於土寒食家家送紙錢鵲鴟作  
窠銜上樹人居朝市未解愁請君暫向北邙遊又內宴  
歸云金吾不敢問行由又七言云誰言遠別心不易天  
星墮地能為石幾時斷得城南陌勿使居人有行役又

云九月匈奴殺邊將漢軍全沒遼水上萬里無人收白骨家城下招魂葬婦人依倚子與夫同居貧賤心亦舒夫死戰場子在腹妾身雖存如畫燭又云願君到處自題名他日知君從此去又賈客云停盃共說遠行期入蜀經蠻誰別離金多衆中為上客夜夜篝緡眠獨遲楚宮行云章華宮中九月時桂花半落紅橘垂江頭騎火照輦道君王夜從雲夢歸下輦更衣入洞房已姬起舞向君王迴身垂手結明璫願君千年萬年壽朝出射

糜夜飲酒永嘉行云黃頭鮮卑入洛陽胡兒持戟昇明  
堂晉家天子作降虜公卿齊走如牛羊紫陌旌旗暗相  
觸家家雞犬驚上屋婦人出門隨亂兵夫死眼前不敢  
哭九州諸侯自顧土無人領兵來護主北人避胡多在  
南南人至今能晉語董逃行云洛陽城頭火瞳瞳亂兵  
燒我天子宫宮城南面有深山盡將老幼藏其間重巖  
為屋椽為食丁男夜行候消息聞道官軍猶掠人舊里  
如今歸未得董逃行漢家幾時重太平又七言云君愛

龍城征戰功妾願青樓歡樂同人生各各有所欲詎得  
將心入君腹又還珠吟云君知妾有夫贈妾雙明珠感  
君纏綿意繫在紅羅襦妾家高樓連苑起良人執戟明  
光裏知君用心如日月事夫誓擬同生死還君明珠雙  
淚垂何不相逢未嫁時又云上陽宮樹黃復綠野豺入  
苑食麋鹿陌上老翁雙淚垂共說武皇巡幸時

王建五言云蛙鳴蒲葉下魚入稻花中又云閉門留野  
鹿分食養山雞又云妻愁耽酒甚人怪考詩嚴又云野



羹溪菜滑山紙水苔香又云掃渠憂竹旱澆地引蘭生  
又云送經還野寺移竹入幽林六言云魚藻池邊射鴨  
芙蓉苑裏看花日色赭袍相似不著紅鸞扇遮寒食行  
云寒食家家出古城老人看屋少年行丘壠年年無舊  
道車徒散行入衰草牧僮驅牛下塚頭畏有家人來洒  
掃遠人無墳水頭祭還引婦姑望鄉拜三日無火燒紙  
錢紙錢那得到黃泉但看壠上無新土此中白骨應無主  
北邙行云北邙山頭多閒土盡是洛陽人舊墓舊墓人

家歸葬多堆著黃金無買處天涯悠悠葬日促崗坂崎  
嶇不停轂高張旗幟繞銘旌夜唱挽歌山下宿洛陽  
城北復城東魂車祖馬長相逢車轍廣若長安路蒿草  
多于松柏樹山頭澗底石漸稀盡向墳前作羊虎誰家  
石碑文字滅後人重取書年月朝朝車馬送葬迴還起  
大宅與高臺溫泉宮云十月一日天子來青繩御路無  
塵埃宮前內裏湯各別每箇白玉芙蓉開朝元閣向南  
山起城繞青山龍暖水夜開金殿看星河宮女知更月

明裏武皇得仙王母去山雞晝鳴宮中樹溫泉汨汨出  
宮流宮使年年修玉樓禁兵去盡無射獵日西麋鹿登  
城頭梨園弟子偷曲譜頭白人間教歌舞田家行云麥  
收上場絹在軸的知輸得官家足不望入口復上身且  
免向城賣黃犢田家衣食無厚薄不見縣門身即樂遼  
東行云年年郡縣送征人將與遼東作丘坂寧為草木  
鄉中生有生不向遼東行射虎行云自去射虎得虎歸  
官差射虎得虎遲獨行以死當虎命兩人相疑終不定

卷十一  
朝朝暮暮空手迴山下綠苗成道徑遠立不敢污箭鏃  
聞死還來分虎肉惜留猛虎著深山射殺恐畏終身閒  
贈王樞密云三朝行坐鎮相隨今上春宮見小時脫下  
御衣先贈賜進來龍馬每教騎長承密旨歸家少獨  
奏邊庭出殿遲自是姓同親向說九重爭遣外人知贈  
駙馬云金埒減添栽藥地玉鞭平與賣書人又七言云  
生金有氣尋還遠仙藥成窠見即移又云薦書入後無  
消息賣盡寒衣却出城又云草堂未辦終須置松樹難

成亦且裁樂府至張籍王建道盡人意中事惟半山尤  
賞好有看若尋常最奇崛成如容易極艱辛此十四字  
唐樂府斷案也本朝唯張文潛得其遺意

盧仝寄男抱孫五言云別來三得書書道違離久書處  
甚麤殺且喜見汝手殷十七又報汝文頗新有當是汝  
母賢日夕加訓誘竹林吾最惜新筍好看守籜龍正稱  
冤莫教入汝口丁寧囑託汝汝活籜龍否兩手莫破拳  
一吻莫飲酒莫惱添丁郎淚子作面垢莫引添丁郎赫

赤日裏走它日吾歸來家人苦彈糾一百放一下打汝  
九十九此篇用盡俗字而不害其為奇崛何常似近世  
詩人學鍊字哉守歲云老來經節臘樂事甚悠悠不及  
兒童日都盧不解愁新蟬云泉溜潛幽咽琴鳴乍往還  
長風剪不斷還在樹枝間村醉云村醉黃昏歸健倒三  
四五摩挲青莓苔嗔我驚爾不井請客云我願拔黃泉  
輕舉隨君去客謝井云改邑不改井此是井卦辭井公  
莫驚怪說我成愁癡我縱有神力爭敢將公歸揚州惡

百姓疑我卷地皮掩關銘云蛇毒毒有形藥毒毒有名  
人毒毒在心對面如弟兄美言不可聽深于千丈坑不  
如掩關坐幽鳥時一聲含曦酬玉川云長壽寺石壁盧  
公一首詩鯨飲海水盡露出珊瑚枝海神知貴不知價  
留向人間光照夜歎昨日云昨日之日不可追今日之  
日須臾期如此如此復如此壯心死盡生鬢絲秋風葉  
落客腸斷不辦斗酒開愁眉賢名聖行甚辛苦周公孔  
公徒自欺盧馬結交詩退之必見之無一語及者豈未

見耶新年云太歲只遊桃李徑春風肯管歲寒枝與沈  
山人云不須服藥求神仙神仙意智或偶然自古聖賢  
放入土淮南雞犬驅上天白日上昇應不惡藥成且輟  
一丸藥暫時掩上山門路釣竿揜在枯桑樹當時只有  
鳥窺窬更亦無人得知處家僮若失釣魚竿定是猿猴  
把將去玉川詩有古樸而奇怪者有質俚而高深者有  
僻澁而條鬯者元和大厯間詩人多出韓門韓于諸人  
多稱其名惟玉川常加先生二字退之強項非苟下人



者今人但誦其月蝕及茶詩而他作往往容易看了此  
公雖與世殊嗜好然以詩求之于養生槩有所聞其序  
閨情酒興纏綿悲壯唐以來詩客酒徒不能道也其間  
理到之言他人所棄者存于篇又常州孟諫議座上聞  
韓員外貶國子博士有感五首云忽見除書到韓君又  
學官死生從有命人事始知難烈火光燒玉庭蕪不養  
蘭山夫與刺史相對兩巔屹又云干祿無便佞宜知黜  
此身員郎猶小小國學大頻頻孤宦心肝直天王若死

嗔朝廷無諫議誰是雪韓人又云誰憐野田子海內一

韓侯左道官雖樂剛腸得健無

武侯反

功名生地獄禮教

死天囚莫言耕種好須避蒺藜秋此三詩出于山人之

口豈非公議在草茅耶

王昌齡五言云北登漢家陵南望長安道上有枯樹根

下有碩鼠窠高皇子孫盡千載無人過寶玉頻發握精

靈其奈何又長信愁云邊頭何慘慘已葬霍將軍部曲

皆相弔燕南代北聞功勲多被黜兵馬亦新分更遣黃

頭戍唯當哭塞雲朝來曲云月旻鳴鳥靜風疎竹影伸  
草發故宮怨花連繡戶春盤龍玉臺鏡唯待畫眉人代  
扶風主人答云去時三十萬獨自還長安不信沙場苦  
君看刀箭瘢雜興云握中銅匕首粉剗楚山鐵義士頻  
報讐殺人不曾缺荅武陵田太守云仗劍行千里微軀  
敢一言曾為大梁客不負信陵恩越女云欲摘芙蓉花莫  
摘芙蓉葉將歸問夫婿顏色何如妾青樓七言云白馬  
金鞍從武皇旌旗十萬宿長楊樓頭少婦鳴笙坐遙見

飛塵入建章出塞云秦時明月漢時關萬里長征人未  
還但使盧城飛將在不教胡馬度陰山採蓮曲云吳姬  
越艷楚王妃爭弄蓮花水濕衣來時江口花迎入採罷  
江頭月送歸浣紗女云錢塘江畔是誰家江上女兒金  
勝花吳王在時不得出今日公然來浣紗昌齡江寧人  
舉進士宏詞為汜水尉以不護細行貶世亂還鄉為刺史  
閭丘曉所殺曉不知為誰與黃祖殺禰衡段簡殺陳子昂  
事相類史稱其詩緒密而思清唐人琉璃堂圖以昌齡為詩

天子其尊之如此集成者三卷絕句高妙者已入詩選  
許渾五言云鷺巢橫卧柳猿飲倒垂藤又云鷺啼幼  
婦懶蠶出小姑忙題王居士云雨中耕白水雲外斲青  
山題峽山寺云山風寒殿磬溪雨夜船燈宿石屏村云僧  
歸下嶺見人語隔溪聞題韋隱居西齋云寺遠僧來少  
橋危客過稀又五言云溪冰寒棹響巖雪夜窻明又云  
漁火夜移灣七言云自翦青莎織雨衣南峯烟火是柴  
扉山妻早報蒸梨熟童子遙迎種豆歸又云今夜月

明何處宿九疑雲盡綠參差又云山齋留客歸黃葉野  
艇送僧披綠莎又云潮生水郭蒹葭響雨過山城橘柚  
疎又云龍歸曉洞雲猶濕麝過春山草自香又云猿來  
近頻獼猴散魚下深潭翡翠閒又云青山有雪諳松性  
碧落無雲稱鶴心又云梧楸遠近千官塚禾黍高低六  
代宮又云嵇阮沒來無酒客應劉亡後少詩人驪山云  
聞說先皇醉碧桃月華浮動鬱金袍風隨玉輦笙歌迴  
雲捲珠簾劍佩高鳳駕北歸山寂寂龍旗西幸水滔滔

貴妃沒後巡遊少，落宮牆見野蒿。登故洛陽城，云禾黍  
離離半野蒿。昔人城此豈知勞？水聲東去市城變，山勢  
北來宮殿高。鴉噪暮雲歸古堞，鴈迷寒雨下空壕。可憐  
緱嶺登仙子，猶自吹笙歌碧桃。凌敲臺云：湘潭雲盡暮  
山出巴蜀雲，消春水來行殿有基荒。薺合寢園無主野  
棠開四皓廟云：避秦安漢出藍關，松桂花陰滿舊山。自  
是無人有歸意，白雲長在水潺潺。渾字用晦仕至郢州  
刺史居京口丁卯橋古律詩三卷名丁卯集其詩如天

孫之織巧匠之斲尤善用古事以發新意其警聯快句  
雜之元微之劉夢得集中不能辨

後村詩話卷十一